



Број/Број: 03/1-50-1-7-45-5/09

Сарајево/Сарајево: 1.12.2009.

ČLANOVIMA ZAJEDNIČKE KOMISIJE ZA ODBRANU I SIGURNOST BiH

Predmet: Informacija o radnoj posjeti institucijama R Italije, od 3. do 6.11.2009.

Veza, akt broj: 03/1,03/11-05-410/09

Predstavnici Zajedničke komisija za odbranu i sigurnost BiH, u organizaciji Misije OSCE-a u BiH, od 3. do 6.11.2009., boravili su u radnoj posjeti institucijama R Italije u Rimu, i to: odborima za odbranu Donjeg doma i Senata Parlamenta Italije, te Operativnom centru civilne zaštite.

U delegaciji Zajedničke komisije za odbranu i sigurnost BiH bili su: Slobodan Šaraba, Hazim Rančić i Vinko Zorić, te Dragica Hinić, sekretar. U pratnji Zajedničke komisije, bio je N.J.E. ambasador Branko Kesić, te Dušan Zoller i Šejla Bektašević iz Misije OSCE-a u BiH.

4. 11. 2009.

Prvi dan članovi Komisije imali su susret s predstavnicima Odbora za odbranu Donjeg doma Parlamenta R Italije. U pozdravnoj riječi, predsjednik Odbora Edmondo Cirielli, istakao je prijateljski odnos i bezrezervnu podršku Italije BiH na njenom putu ka NATO-u u EU. To su potvrdili i dosadašnjim aktivnim učešćem u formiranju Oružanih snaga BiH, te aktivnim učešćem svojih vojnika u sastavu ALTEA i EUFOR-a. Osvrnuo se kratko i na ekonomske odnose dviju zemalja, te političke prilike u regionu i BiH u kontekstu butmirskih pregovora, s nadom da će doći do povoljnog rješenja.

Slobodan Šaraba zahvalio se na izrazima dobrodošlice, kao i za dosadašnju podršku koju je Italija dala BiH, posebno za učešće njenih vojnika u uspostavi mira u našoj zemlji. Istakao je da je stanovništvo BiH italijanske vojnike primilo izuzetno prijateljski i da nikada nije bilo, niti ima bilo kakve opasnosti za njihovu sigurnost. U vezi sa ustavnim promjenama, istakao je da je BiH zemlja različitosti, te iz tog ugla i treba posmatrati trenutnu situaciju, u nadi da će ipak doći do dogovora tri naroda.

Hazim Rančić također je izrazio zahvalnost Italiji za sve što je učinila za BiH u posljednjih 20 godina. I on je naglasio da je sigurnost italijanskih vojnika u našoj zemlji neupitna. Ističući složeno uređenje BiH po Dejtonskom sporazumu, potencirao je pitanje entitetskog glasanja koje postaje etničko glasanje u BiH koja ima tri naroda, ali i nacionalne manjine. Stoga je on protiv zloupotreba takvog glasanja. Istakao je da je i dalje neophodno prisustvo međunarodne zajednice u BiH.

Vinko Zorić naveo je da u BiH imamo tri naroda i dva veta, gdje je jedino hrvatski narod ugrožen jer ne raspolaže takvom mogućnošću, a ustavne promjene treba da omoguće ravnopravnost u odlučivanju. Mišljenja je da bez snažne međunarodne konferencije neće doći do dogovora o ustavnim promjenama.

Predstavnik Demokratske partije u Odboru zanimao je odnos građana BiH prema italijanskim vojnicima, te kakav je njihov doprinos sigurnosti u BiH.

Na navedena pitanja Šaraba i Rančić ponovili su izraze zahvalnosti za doprinos koji su italijanski vojnici dali u stabilizaciji mira i sigurnosti u BiH, te istakli i potrebu još tješnje ekonomske saradnje.

Hazim Rančić zamolio je predstavnike Odbora da daju bezrezervnu podršku BiH u procesu liberalizacije viznog režima, te ulasku BiH u EU i NATO. Naglasio je i da je neophodan prijenos postojećih ovlaštenja s međunarodnih snaga na državni nivo, te također u tom smislu i prijenos ovlaštenja s OHR-a na institucije BiH.

Vinka Zorića zanimalo je da li se građani Italije osjećaju sigurnim prilikom dolaska u BiH, na što je dobio pozitivan odgovor.

Edmondo Cirielli predsjednik Odbora, na kraju je još jednom istakao da će Vlada Italije učiniti sve na putu BiH ka članstvu u EU i NATO. Također, njeni vojnici spremni su pružiti i odgovarajuću podršku OSBiH.

Na kraju susreta, Slobodan Šaraba još se jednom zahvalio domaćinima na prijemu i riječima podrške.

5.11.2009.

Drugog dana posjete predstavnici Zajedničke komisije imali su dva susreta.

Prva je bila posjeta Operativnom centru civilne zaštite R Italije. Sastanku i prezentaciji rada ovog centra, te njegovom obilasku prisustvovao je dr. Agostino Miozzo, direktor, sa svojim saradnicima. Prezentirajući rad ovog centra, istakao je da je u Italiji civilna zaštita organizirana na tri nivoa, i to: nivo grada ili sela, gdje djeluju lokalne snage, nivo regije i nivo nacionalnog ureda koji organizira i koordinira sva dešavanja na terenu u slučaju izuzetno velikih nesreća. Nakon niza loših iskustava u prošlosti, Italija svoje aktivnosti u oblasti civilne zaštite sada zasniva prije svega na predviđanjima situacija i njihovom preveniranju. Naglasio je da Operativni centar civilne zaštite djeluje pri Vladi R Italije. Potom je iznio i osnovne rizike s kojima se susreću na terenu,

klasificirajući ih na prirodne i od ljudskim faktorom izazvane rizike, osvrćući se na svaki pojedinačno. Istakao je i saradnju s drugim službama civilne zaštite u regionu.

Informirao je i o trogodišnjem projektu EUROMED, u kojem je predviđeno i učešće BiH, s obzirom da se radi o projektu koji se odnosi na formiranje mediteranske zone EU za suprotstavljanje velikim katastrofama. Na kraju je istakao da civilna zaštita R Italije ne želi nikome nametati svoj model već isključivo prenositi svoja iskustva onima koje to interesira.

Nakon obilaska odjeljenja Operativnog centra, predstavnici Zajedničke komisije zahvalili su se domaćinima i istakli uvjerenje za nastavak saradnje dvije zemlje u oblasti civilne zaštite.

U drugom dijelu delegacija Zajedničke komisije imala je sastanak s članovima Odbora za odbranu Senata Parlamenta R Italije, s prof.dr Gianpierom S. Santonijem na čelu, te, uz ostale članove, generalom Del Vecciom, koji je bio komandant italijanskih snaga u BiH, i senatorom Torrijem. Oni su istakli bezrezervnu podršku Italije BiH na njenom putu ka članstvu u EU i NATO u kontekstu reformi koje moraju biti provedene.

Nakon rezmjene mišljenja o određenim pitanjima, predstavnici Zajedničke komisije zahvalili su se na prijemu i podršci i pozvali ih da posjete BiH.

DRUGI ZAMJENIK
PREDSJEDAVAJUĆEG KOMISIJE
Slobodan Šaraba

Dostavljeno:

- naslovu
- a/a